

Misi Global Sumud Flotilla ke Gaza

Penahanan sukarelawan GSF bertentangan nilai kemanusiaan

Kuala Lumpur: Yang di-Pertuan Agong, Sultan Ibrahim bertitah tindakan menghalang dan menahan peserta misi kemanusiaan Global Sumud Flotilla (GSF) sebagai bertentangan dengan nilai kemanusiaan sejagat.

“Mereka hanya dalam misi kemanusiaan membawa bekalan makanan, namun dihalang dan ditahan. Ini bertentangan dengan nilai kemanusiaan sejagat,” titah baginda kepada Royal Press Office (RPO), semalam.

Dalam pada itu Sultan Ibrahim menyifatkan GSF sebagai misi kemanusiaan yang murni dalam membantu mereka yang kelaparan termasuk golongan warga emas, wanita serta kanak-kanak di Gaza.

“Sukarelawan yang terbabit dalam misi itu termasuk rakyat Malaysia, sanggup menggalas risiko dan cabaran demi membawa mesej kemanusiaan ke peringkat antarabangsa,” ti-

tah baginda.

Seri Paduka juga bertitah, misi GSF adalah contoh semangat persaudaraan tanpa batas dalam membantu mereka yang benar-benar memerlukan bantuan.

“Pada hari ini (semalam), saya mendapatkan taklimat terkini mengenai perkembangan semasa GSF termasuk usaha yang sedang dilakukan oleh Malaysia dalam membebaskan sukarelawan kita,” titah baginda.

“Semoga setiap usaha murni yang sedang dilakukan serta digerakkan kerajaan dalam membantu sukarelawan rakyat kita dipermudahkan dan dilindungi Allah SWT,” titah baginda.

Terdahulu, Sultan Ibrahim berkenan menerima mengadap Perdana Menteri, Datuk Seri Anwar Ibrahim di Istana Bukit Tunku, di sini.

Yang hadir sama, Ketua Polis Negara, Datuk Seri Mohd Khalid Ismail.



Sultan Ibrahim berkenan menerima menghadap Anwar dan Mohd Khalid di Istana Bukit Tunku, Kuala Lumpur, semalam.
(Foto FB Sultan Ibrahim Sultan Iskandar)